

[Augsburg], 15. Oktober 1569

An Theodor Zwinger

UB Basel, Fr. Gr. I 11, fol. 323r.

S. Etsi non ita pridem hac eadem scripsi, Clariss[ime] vir, Domine et amice colende, tamen, cum quaedam ad Episcopium mittenda essent, et literae non omnes perferri soleant, repetenda esse duxi. Conueni Fuggeranum ministrum Sebastianum Zaeh, qui dixit sub Festum Natalis Christi, 600 f. Carini haeredibus fore numerandos pro Bibliotheca illius, si rectè accepi. Quòd si D. Iodocus Pfeiffer ita iusserit: libenter se mihi 50 f. hic numeraturum, de illa summa detractos. Quae sanè commodiss[ima] ratio fuerit: nisi D. Luzelmanno id minus probetur. Testatoris voluntati satisfieri decet, et expectari tempus ab illo praefinitum, caeteraque fieri quae ille iussit. Itaque poculum accepta pecunia hic conficiendum curabitur, modò forma illius, cum Carini insignibus et coloribus mihi describatur, ac potius depingatur. Habito enim in aedibus solertiss[imi] aurifabri, qui illam ideam ἔξακριβώσει. Sed haec hactenus. Oporinianorum moram καὶ ἀγραφίαν ferre necesse habeo, modò vel nunc tandem pergant, vt ad proximas nondinas promissa appareant. De Episcopio nunc nihil queror: et spero illum etiam posthac in officio futurum. Vt te tuum theatrum, ita me Demosthenes adhuc occupat. Verum tu fidelem et solerter laborum socium, Andream Iociscum amisisti: ego etiam condidum et officiosum amicum. Bonus ille vir et doctus, dum nuptias meditatur, in exequias incidit. Sed quia sic illius fata tulerunt, nos quoque aequis feramus animis, et memoriam eius, scriptis nostris celebremus. Vale, et, si quid est quod à me fieri velis, pro iure tuo imperato. Idibus Octobris 1569.

Hiero[nymus] Wolfius
Tuus.